

Appel

I.

Lanquand li iorn son lonc en mai,
m?es bels douz chans d?auzels de lonh,
e quand me sui partitz de lai,
remembra·m d?un?amor de lonh.
vauc de talan enbroncs e clis,
si que chans ni flors d?albespis
no·m platz plus que l?inverns gelatz.

II.

Ia mais d?amor no·m gauzirai,
si no·m gau d?est?amor de lonh,
que gensor ni melhor no·n sai
vas nulha part, ni pres ni lonh;
tant es sos pretz verais e fis,
que lai el renc dels Sarrazis
fos eu per lieis chaitius clamatz!

III.

Be·m parra iois, quan li querrai
per amor dieu l?alberc de lonh,
e s?a lieis plai, albergarai
pres de lieis, si be·m sui de lonh;
adoncs parra·l parlamens fis,
quand drutz lonhdas? er tant vezis
c?ab bels digz iauzira solatz.

IV.

Iratz e gauzens me·n partrai,
quan veirai cest?amor de lonh;
mas non sai coras veirai,
car trop son nostras terras lonh:
assatz i a pas e camis,
e per aisso no·n sui devis;
mas tot sia cum a Dieu platz.

V.

Ben tenc lo Senhor per verai,
per qu?ieu veirai l?amor de lonh;
mas per un ben que me·n eschai
n?ai dos mals, car tant m?es de lonh.
ai! car me fos lai pelleris,
si que mos fustz e mos tapis

fos pels sieus bels huolhs remiratz!

VI.

Dieus, que fetz tot quant ve ni vai,
e formet cest?amor de lonh,
mi don poder, que·l cor eu n?ai,
qu?en breu veia l?amor de lonh
veraiamen en locs aizis,
si que la cambra e·l iardis
mi resembles totz temps palatz.

VII.

Ver ditz qui m?apella lechai
ni desiran d?amor de lonh,
car nulhs autres iois tant no·m plai
cum iauzimens d?amor de lonh;
mas so qu?eu vuolh m?es tant ahis!
qu?enaissi·m fadet mos pairis
qu?ieu ames e non fos amatz.

VIII.

Mas so qu?ieu vuolh m?es tant ahis!
tutz sia maudit lo pairis
que·m fadet qu?ieu non fos amatz!

- letto 413 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/appel>